

PRIJEDLOG

Na osnovu Zakona o privremenom korišćenju javnih površina na području Kantona Sarajevo ("Službene novine Kantona Sarajevo", broj: 20/04, 26/12, 32/12, 24/15), člana 55. i 104. Statuta Općine Ilijaš – prečišćeni tekst ("Službene novine Kantona Sarajevo", broj: 20/9, 46/18), člana 99. Poslovnika Općinskog vijeća Ilijaš ("Službene novine Kantona Sarajevo", broj: 2/10 i 18/05, 7/19) Općinsko vijeća Ilijaš, na redovnoj 30. sjednici, održanoj dana, 29.05.2019. godine, d o n o s i:

ODLUKU

o privremenom korištenju javnih površina na području Općine Ilijaš

I - OPĆE ODREDBE

Član 1.

Ovom Odlukom utvrđuju se posebni uslovi i kriteriji za dodjelu lokacije za privremeno korištenje javnih površina za postavljanje kioska, slobodnostojećih otvorenih bašti, slobodnostojećih reklamnih panoa, slobodnostojećih displeja i ostalih sadržaja definisanih članom 2. ove Odluke, zone javnih površina, visina naknade, način naplate, mjere za sigurnu i efikasnu naplatu naknade, zaštita javnih površina, nadzor nad provođenjem ove Odluke i druga pitanja od značaja za privremeno korištenje javnih površina na području Općine Ilijaš.

Član 2.

(1) Sadržaji u smislu ove Odluke koji se mogu privremeno postaviti na javnim površinama su:

- a.) Kiosk je privremena, tehnološki dovršena, cjelovita i tipizirana prostorna jedinica, lagane konstrukcije koji se može premještati i uklanjati sa lokacije u komadu. Postavljanje na terenu izvodi se suhom montažom na odgovarajućoj podlozi. Najveća dozvoljena površina iznosi 12 m², što ukupno sa zemljištem za upotrebu istog može iznositi maksimalno 20,00 m².
- b.) Slobodnostojeću otvorenu baštu čine: stolovi, stolice, zaštite od sunca (suncobran ili tenda), pomična ograda, žardinjere za cvijeće, sistem za rashlađivanje odnosno grijanje, šank sa pratećom opremom, rashladni uređaji. Nije dozvoljeno postavljanje čvrsto ugrađene opreme bašte, te betoniranje i drugi čvrsti radovi na javnoj površini. Slobodnostojeću ljetnu baštu mogu predstavljati i rekonstruirana prevozna sredstva posebno prilagođena za obavljanje ugostiteljske djelatnosti. Ukoliko se uviđajem na terenu utvrdi da je teren neprilagođen ljetnoj bašti, te da to utiče na funkcionalnost iste, odobrit će se postavljanje montažno-demontažne platforme, koja se u svakom trenutku može lako demontirati i brzo osloboditi zauzetu površinu u slučaju potrebe.
- c.) Slobodnostojeći reklamni pano.
- d.) Slobodnostojeći displej.
- e.) Slobodnostojeće telefonske govornice.
- f.) Stolovi ispred ugostiteljskih radnji se u pravilu postavljaju u neposrednoj blizini objekta u kojoj se nalazi ugostiteljski poslovni prostor i sa minimalnom pješačkom komunikacijom. U ljetnoj bašti postavljenoj ispred ugostiteljskog objekta nije dozvoljeno postavljanje roštilja, ražnja, šank-pulta, fontane, muzičkog uređaja, niti je dozvoljeno izvođenje muzike uživo. Nije dozvoljeno postavljanje čvrsto ugrađene opreme ispred ugostiteljskih radnji, te betoniranje i drugi čvrsti radovi na javnoj površini. Ukoliko se uviđajem na terenu utvrdi da je teren neprilagođen postavljanju stolova ispred ugostiteljskih radnji, te da to utiče na funkcionalnost iste, odobrit će se postavljanje montažno-demontažnog podijuma – platforme, koji se u svakom trenutku može lako demontirati i brzo osloboditi zauzetu

površinu u slučaju potrebe.

g.) Prodajni sto ispred poslovnog prostora za izlaganje i prodaju robe je pokretna, lako prenosiva i prostorno neovisna jedinica na kojoj se vrši izlaganje i prodaja robe.

h.) Prodajni sto/tezga je pokretna, lako prenosiva i prostorno neovisna jedinica na kojoj se vrši izrada i prodaja umjetničkih predmeta, te prodaja drugih vrsta usluga (portreti, nakit, slike, umjetničke tvorevine i sl.).

i.) Rashladni uređaj je uređaj za izlaganje i prodaju pića, sladoleda i sl. Ispred poslovnog prostora mogu se postaviti najviše dva rashladna uređaja.

j.) Žardinjera za cvijeće je betonsko, drveno ili korito od drugog prikladnog materijala, ispunjeno zemljom u kojoj su zasađene dekorativne biljke. Oblik, veličina i upotrijebljeni materijal moraju odgovarati neposrednoj okolini i funkciji žardinjere.

k.) Vaga za osobno mjerenje je sprava za mjerenje tjelesne težine i visine.

l.) Sanduk za čišćenje obuće je naprava otvorenog tipa, maksimalne tlocrtna površine od 0,5 m², uključujući prostor za obavljanje djelatnosti i prodaju robe (vezice).

m.) Cirkusni šator je ograđeni prostor za održavanje cirkuskih predstava u svrhu zabave djece i odraslih, sa pratećim sadržajem.

n.) Klupa za sjedenje.

o.) Čuvarska kućica je naprava zatvorenog tipa, jednodostorna, demontažna i prenosiva cjelina izgrađena od više konstrukcijskih dijelova koji se povezuju bez primjene građevinskih vezova i koji se povezuju na podlogu bez ubetoniravanja ili sličnog trajnog povezivanja. Oblikovanje mora biti kvalitetno, u skladu sa ambijentom i ne smije estetski narušavati okolinu. Maksimalna tlocrtna površina je do 4,00 m². Navedeni sadržaj se ne odnosi na objekte koje u istoj namjeni koriste snage Policijskih organa.

p.) Reklamni balon.

r.) Reklamni automobili se postavlja u svrhu promocije događaja, usluga i proizvoda.

s.) Info stolovi su pokretni elementi za podjelu promotivnog materijala i skupljanje novčane pomoći u humanitarne svrhe.

t.) Jarbol je montažno-demontažni element koji omogućava postavljanje zastave, promotivnog ili reklamnog karaktera, postavljen u skladu sa ambijentom, prikladnog estetskog sadržaja.

u.) Zabavni park je prostorno definirana cjelina čija tlocrtna organizacija, odnosno zauzeće javne površine ovisi o broju i vrsti naprave za zabavu;

v.) Drugi specifični sadržaji (dječiji autići i vozići, uređaju za pečenje pečenjarskih proizvoda, prodaja lutrija, srećki, polovnih knjiga i slične literature, umjetničkih slika, iznajmljivanje bicikla, objekata jednostavnih usluga u nepokretnom ili priključnom vozilu, objekata jednostavnih usluga na kolicima, umjetnici za izvođenje kulturnog i zabavnog programa, plohe za boćanje, plohe za šah na otvorenom s tim da pogodno mjesto bude uredno i sličnih sadržaja);

(2) Održavanje kulturnih, zabavnih, sportskih, humanitarnih i drugih manifestacija. Manifestacijom se smatra svako događanje u kraćem vremenskom razdoblju povodom kulturnih, zabavnih, sportskih, humanitarnih i drugih dešavanja, koje može biti popraćeno ugostiteljskom i trgovačkom djelatnošću.

(3) Odlaganje građevinskog materijala podrazumijeva utovar, istovar i deponovanje građevinskog materijala i opreme, za izvođenje radova na osnovu pravosnažnog odobrenja za građenje, odnosno izvođenje drugih radova. Izvođač radova je dužan da deponovani građevinski materijal zaštititi od rasturanja odgovarajućom ogradom.

(4) Građevinska fasadna skela je konstrukcija za izvođenje radova na visini, propisno označene i osigurane u skladu sa tehničkim propisima i normativima.

(5) Javni parking prostor je površina predviđena za parkiranje vozila, propisno označena u skladu sa saobraćajnim propisima.

Član 3.

(1) Odobrenje za privremeno korištenje javne površine, izuzetno, se može izdati za postavljanje drugih sadržaja i uređaja koji nisu navedeni u ovoj Odluci, na prijedlog Općinskog načelnika.

Član 4.

(1) Poslovi prvostepenog upravnog rješavanja u oblasti urbanizma su donošenje urbanističke saglasnosti i odobrenja za građenje za izvođenje radova na javnoj površini u svrhu postavljanja kioska, slobodnostojećih otvorenih bašti, slobodnostojećih reklamnih panoa, slobodnostojećih displeja i slobodnostojećih telefonskih govornica, te donošenje rješenja za privremeno korištenje za javni parking prostor.

(2) Poslovi prvostepenog upravnog rješavanja u oblasti komunalnih djelatnosti su donošenje rješenja za privremeno korištenje javnih površina za:

a.) postavljanje:

- građevinskih fasadnih skela, ako nije definisano odobrenjem za građenje;
 - prodajnih stolova ispred poslovnih prostora za izlaganje i prodaju robe;
 - stolova ispred ugostiteljskih radnji;
 - prodajnih stolova povodom pojedinih praznika za promet robe na malo kao: čestitke, razglednice, prskalice, cvijeće, ukrase za novogodišnje i druge praznike i posebne prigode, ulaznice za sportske, kulturne, humanitarne i druge manifestacije;
 - rashladnih uređaja;
 - cirkusnih šatora;
 - žardinjera za cvijeće;
 - vaga za osobno mjerenje;
 - sanduka za čišćenje obuće;
 - klupa za sjedenje;
 - čuvarskih kućica;
 - reklamnih balona i
 - drugih specifičnih sadržaja (dječiji autići, vozići, uređaji za pečenje pečenjarskih proizvoda, prodaja lutrija, srećki, polovnih knjiga i slične literature, umjetničkih slika, iznajmljivanje bicikala, objekata jednostavnih usluga u nepokretnom ili priključnom vozilu, objekata jednostavnih usluga na kolicima i sl.)
- (3) Održavanje kulturnih, zabavnih, sportskih, humanitarnih i drugih manifestacija;
- (4) Odlaganje građevinskog materijala, utovar i istovar građevinskog materijala.

Član 5.

(1) Rješenje kojim se odobrava privremeno korištenje javne površine donosi Općinski načelnik putem nadležne Službe.

(2) Rješenje donesena u postupku primjene ove Odluke dostavljaju se nadležnom inspektoru i Službi za privredu i finansije Općine Ilijaš.

II – ZONE JAVNIH POVRŠINA

Član 6.

(1) Javne površine na području Općine Ilijaš podijeljene su u četiri zone i to: Ekstra, Prvu, Drugu i Treću zonu.

(2) Ekstra zona obuhvata:

a.) dio ulice 126. Ilijaške brigade od raskrsnice sa ulicom Bogumilska do raskrsnice sa ulicom Hašima Spahića /Pješačka zona "Centar Ilijaš"/ i Trg "Alije Izetbegovića" u Ilijašu;

(3) Prva zona obuhvata:

a.) dio užeg urbanog područja grada Ilijaš koju čine ulice: 126. Ilijaške brigade (bez Ekstra zone), Ivana Franje Jukića, Kakanjska, Omladinska, Bogumilska do broja 10, Hašima Spahića i Bosanski put na dijelu od pravoslavne crkve do Alića rampe;

(4) Druga zona obuhvata:

a.) ostalo urbano područje grada Ilijaš, te dio Ulice Bosanski put od Alića rampe do potoka Gnionica i od pravoslavne crkve do raskrsnice za skretanje za naselje Luka u Starom Ilijašu, te ulice Moševićka i Žrtava genocida u Srebrenici u Podlugovima i

(5) Treća zona obuhvata:

a.) ostale javne površine na području Općine.

III – USLOVI I KRITERIJI ZA PRIVREMENO KORIŠTENJE JAVNIH POVRŠINA

Član 7.

(1) Postupak dodjele lokacije za privremeno korištenje javne površine pokreće se podnošenjem zahtjeva od strane zainteresovanog lica Općinskom načelniku putem nadležne Službe.

(2) Uz zahtjev se prilaže:

a.) Akt o registraciji izdat od strane nadležnog Suda;

b.) Odobrenje za obavljanje djelatnosti, izdato od nadležne općinske službe;

c.) Uvjerenje o poreskoj registraciji;

d.) Dokaz o otvorenom transakcijskom računu.

Član 8.

(1) Period privremenog korištenja javnih površina za postavljanje stolova ispred ugostiteljskih objekata utvrđuje se u periodu od 15. aprila do 15. oktobra tekuće godine za ljetni period.

(2) U slučaju korištenja javne površine suprotno odredbama člana 7. ove Odluke, obaveze po osnovu korištenja počinju teći i završavaju u skladu sa datumom konstatovanim u zapisniku nadležnog inspektora.

Član 9.

(1) Stručno lice za definisanje javne površine dužno je, po prijemu zahtjeva za privremeno korištenje javne površine izvršiti uviđaj na licu mjesta, te javnu površinu koja je predmet korištenja, obilježiti i napraviti foto-dokumentaciju, koja treba da čini sastavni dio Zapisnika o uviđaju na licu mjesta.

(2) Stručno lice je također dužno dati svoj nalaz i mišljenje i po mogućnosti izraditi skicu javne površine.

Član 10.

(1) Dodjelu lokacija za privremeno korištenje javnih površina na osnovu elaborata, za postavljanje kioska i slobodnostojećih otvorenih bašti, slobodnostojećih reklamnih panoa, slobodnostojećih displeja i slobodnostojećih telefonskih govornica vrši Služba za prostorno uređenje i zaštitu okoliša.

(2) Dodjela lokacija vrši se putem javnog oglasa.

(3) Javni oglas iz stava 1. ovog člana objavljuje se u jednom od dnevnih listova koji se distribuira na teritoriji Federacije Bosne i Hercegovine i web stranici Općine Ilijaš.

(4) Javni oglas iz stava 1. ovog člana treba da sadrži:

a.) Podatke o lokaciji/bliža adresa ili k.č;

b.) Površina lokacije;

c.) Vrsta objekta predviđenog za postavljanje;

- d.) Početnu cijenu naknade po sadržaju ili m²;
- e.) Način plaćanja naknade;
- f.) Rok za podnošenje prijava;
- g.) Naziv i sjedište organa kojem se podnosi prijava;
- h.) Način podnošenja prijave i dokaze koje je učesnik dužan priložiti uz prijavu;
- i.) Kriterije za bodovanje;
- j.) Način obavještenja o rezultatima oglasa;
- k.) Postupak po prigovoru na rang listu o rezultatima javnog poziva;
- l.) Upozorenje da se nepotpune prijave neće razmatrati i
- m.) Upozorenje da će se lokacija dodijeliti na privremeno korištenje drugom učesniku na javnom oglasu prema redu prvenstva, ako prvoplasirani učesnik ne plati naknadu za dodijeljenu lokaciju u roku i na način utvrđen rješenjem.

Član 11.

- (1) Dodjelu lokacija za privremeno korištenje javnih površina za postavljanje sadržaja iz člana 10. ove Odluke izvan obuhvata Elaborata, odobrava Općinski načelnik putem Službe za prostorno uređenje i zaštitu okoliša bez oglašavanja prema prostornim mogućnostima i mišljenju Zavoda za planiranje razvoja Kantona Sarajevo.
- (2) Naknada za privremeno korištenje javne površine iz prethodnog stava se utvrđuje prema zoni u kojoj se lokacija nalazi.

Član 12.

- (1) Postupak dodjele lokacije provodi Komisija koju rješenjem imenuje Općinski načelnik.
- (2) Komisija iz stava 1. ovog člana:
 - a.) Priprema javni oglas za dodjelu lokacija;
 - b.) Razmatra pristigle prijave na javni poziv i vrši bodovanje;
 - c.) Utvrđuje rang listu i istu dostavlja Općinskom načelniku na saglasnost;
 - d.) Nakon što Općinski načelnik da saglasnost objavljuje Rang listu na oglasnoj tabli i web stranici Općine.
- (3) Pismene prijave na javni oglas podnose se Komisiji, a predaju se neposredno na protkol Općine Ilijaš ili poštom preporučeno sa naznakom "Prijava na javni oglas za dodjelu lokacija za privremeno korištenje javnih površina – ne otvarati".

Član 13.

- (1) Pravo na dodjelu lokacije iz člana 11. ove Odluke utvrđuje se na osnovu sljedećih kriterija:
 - a.) uredno izmirivanje dosadašnjih obaveza po osnovu korištenja javne površine
 - eliminacioni kriterij 5 bodova
 - b.) visina naknade, za svaku KM iznad početnog iznosa naknade 5 bodova
 - c.) član šehidske porodice i porodice poginulog borca 20 bodova
 - d.) invalidnost podnosioca ponude – ratnog vojnog invalida;
 - Tjelesno oštećenje 100 % 15 bodova
 - Tjelesno oštećenje 20-90% za svaki stepen tjelesnog oštećenja 1 bod
 - e.) Invalidnost podnosioca ponude (neratni invalidi)
 - Tjelesno oštećenje 100 % 10 bodova
 - Tjelesno oštećenje 20-90% za svaki stepen tjelesnog oštećenja 0,5 bodova
 - f.) Ratna priznanja:
 - Zlatni ljiljan i Zlatna policijska značka 5 bodova
 - Ostala vojna priznanja utvrđena Zakonom o posebnim pravima dobitnika ratnih

- priznanja i odlikovanja i članova njihovih porodica 2 boda
- g.) Podnosilac za svaku godinu učešća u Oružanim snagama RBiH: 2 boda
- h.) Osobe koje su bile zatočene u logoru, a ako nisu obuhvaćeni u jednoj od prethodnih tačaka 5 bodova
- i.) Civilne žrtve rata 5 bodova
- j.) Članovi uže porodice podnosioca ponude
- Za svakog člana 1 bod
 - Za svakog nezposlenog člana broj bodova iz ove tačke uvećava se za..... 1 bod
- k.) Ponuđač sa prebivalištem sa područja Općine Ilijaš u kontinuitetu, najmanje 5 godina 5 bodova
- (2) Pod članom uže porodice, u smislu ove Odluke smatraju se: bračni drug, roditelji i djeca koja žive u zajedničkom domaćinstvu sa podnosiocem ponude.

Član 14.

- (1) Najpovoljnija ponuda za dodjelu lokacija iz člana 10. Odluke je ponuda sa najvećim brojem bodova.
- (2) U slučaju da više ponuđača ima jednak broj bodova, prednost ima ponuda prema sljedećem redoslijedu:
- sa najvećim iznosom ponuđene naknade;
 - član šehidske porodice i porodice poginulog borca;
 - osobe sa tjelesnim oštećenjem organizma od 100%;
 - osobe sa najdužim učešćem u Oružanim snagama RBiH;
 - osobe sa najvećim brojem nezaposlenih članova porodičnog domaćinstva;

Član 15.

Učesnik javnog oglasa za postavljanje slobodnostojećih ljetnih bašti se boduje po osnovu ponuđene naknade za svaku KM iznad početnog iznosa.

Član 16.

- (1) Učesnici javnog oglasa imaju pravo prigovora na Rang listu Drugostepenoj stručnoj komisiji Općinskog vijeća Ilijaš u roku od 15 dana od dana objave.
- (2) Odluka Komisije po prigovoru iz stava (1) ovog člana je konačna.
- (3) Nakon isteka roka za podnošenje prigovora na Rang listu Općinski načelnik putem Službe za prostorno uređenje i zaštitu okoliša donosi Rješenje o dodjeli javne površine na privremeno korištenje.

IV - NAKNADA, NAČIN PLAĆANJA, VRIJEME TRAJANJA I MJERE ZA EFIKASNU NAPLATU NAKNADE ZA PRIVREMENO KORIŠTENJE JAVNIH POVRŠINA

Član 17.

Korisnici javnih površina obavezni su plaćati naknadu za korištenje u skladu sa odredbama ove Odluke.

Član 18.

- (1) Naknada za postavljanje kioska mjesečno po 1 m² iznosi:

- | | |
|----------------------|---------|
| a.) Prva zona | 8,00 KM |
| b.) Druga zona | 7,00 KM |

- c.) Treća zona 5,00 KM
- (2) Naknada za privremeno korištenje javne površine iz stava (1) ovog člana plaća se mjesečno unaprijed, a za prvi mjesec korištenja prilikom preuzimanje rješenja.
- (3) Period privremenog korištenja javnih površina za postavljanje kioska je do dvije godine uz mogućnost produženja. Period se računa od dana pravosnažnosti rješenja o odobrenju za građenje.

Član 19.

- (1) Naknada za postavljanje slobodnostojeće otvorene bašte, mjesečno po 1 m² iznosi:

- a.) Ekstra zona 6,00 KM
- b.) Prva zona 5,00 KM
- c.) Druga zona 4,00 KM
- d.) Treća zona 3,00 KM
- (2) Naknada za privremeno korištenje javne površine iz stava (1) ovog člana plaća se mjesečno unaprijed, a za prvi mjesec korištenja prilikom preuzimanje rješenja.

Član 20.

- (1) Naknada za postavljanja slobodnostojećih reklamnih panoa i slobodnostojećih displeja, mjesečno po 1 m² površine panoa ili displeja iznosi:

- a.) Ekstra zona 15,00 KM
- b.) Prva zona 12,00 KM
- c.) Druga zona 8,00 KM
- d.) Treća zona 5,00 KM
- (2) Naknada za privremeno korištenje javne površine iz stava (1) ovog člana plaća se mjesečno unaprijed, a za prvi mjesec korištenja prilikom preuzimanje rješenja.
- (3) Period privremenog korištenja javnih površina za postavljanje sadržaja iz stava (1) ovog člana je jedna, a najviše dvije godine.

Član 21.

- (1) Naknada za postavljanje telefonske govornice, po jednoj telefonskoj govornici mjesečno iznosi:

- a.) Ekstra zona 20,00 KM
- b.) Prva zona 18,00 KM
- c.) Druga zona 15,00 KM
- d.) Treća zona 10,00 KM
- (2) Naknada za privremeno korištenje javne površine iz stava (1) ovog člana plaća se mjesečno unaprijed, a za prvi mjesec korištenja prilikom preuzimanje rješenja.
- (4) Period privremenog korištenja javnih površina za postavljanje sadržaja iz stava (1) ovog člana je do pet godina.

Član 22.

Naknada za postavljanje stolova ispred ugostiteljskog objekata radi pružanja ugostiteljskih usluga, izložbenog stola i staka za izlaganje robe za prodaju ispred trgovačke radnje:

- a.) Ekstra zona 6,00 KM
- b.) Prva zona 4,00 KM
- c.) Druga zona 3,00 KM

- d.) Treća zona 2,00 KM
- (2) Naknada za privremeno korištenje javne površine iz stava (1) ovog člana plaća se mjesečno unaprijed, a za prvi mjesec korištenja prilikom preuzimanje rješenja.
- (3) Period privremenog korištenja javnih površina za postavljanje stolova ispred ugostiteljskih radnji utvrđuje se u periodu od 15. marta do 15. novembra tekuće godine za ljetni period.

Član 23.

- (1) Naknada za postavljanje prodajnog stola za prodaju, lutrija, novina, polovnih knjiga i druge literature, umjetničkih slika i slično mjesečno po jednom stolu iznosi:

- a.) Ekstra zona 25,00 KM
- b.) Prva zona 18,00 KM
- c.) Druga zona 15,00 KM
- d.) Treća zona 10,00 KM

- (2) Naknada za privremeno korištenje javne površine iz stava (1) ovog člana plaća se jednokratno ukoliko ne prelazi iznos od 100,00 KM, a ukoliko prelazi navedeni iznos unaprijed u dvije jednake rate. Prva rata plaća se prije preuzimanja rješenja kojim se odobrava privremeno korištenje javne površine, a druga rata po isteku polovine odobrenog vremena korištenja.

Član 24.

- (1) Naknada za postavljanje prodajnog stola za prodaju ulaznica za održavanje javnih kulturno-zabavnih, sportskih i drugih manifestacija, izvlačenja nagrada u igrama na sreću, reklamiranja proizvoda namijenjenih tržištu, kao i za postavljanje prodajnog stola povodom pojedinih praznika za prodaju robe na malo kao: cvijeća, čestitki, razglednica, ukrasa, prskalica, svijeća, jelki, bižuterije, kožne galanterije, predmeta kućne radinosti i drugih prigodnih poklona za jedan dan po jednom stolu iznosi:

- a.) Ekstra zona 30,00 KM
- b.) Prva zona 20,00 KM
- c.) Druga zona 15,00 KM
- d.) Treća zona 10,00 KM

- (2) Zahtjev za donošenje rješenja kojim se odobrava privremeno korištenje javnih površina za namjene iz stava (1) ovog člana podnosi se najkasnije pet dana prije početka korištenja.

- (3) Naknada za privremeno korištenje javne površine iz stava (1) ovog člana plaća se unaprijed, a dokaz o uplati dostavlja u Službu za saobraćaj, stambeno-komunalne poslove i građenje prilikom preuzimanja rješenja.

Član 25.

- (1) Naknada za postavljanje rashladnog uređaja za prodaju sladoleda, sokova, kafe i uređaja za pečenje pilića, mjesečno po jednom uređaju iznosi:

- a.) Ekstra zona 55,00 KM
- b.) Prva zona 45,00 KM
- c.) Druga zona 35,00 KM
- d.) Treća zona 25,00 KM

- (2) Naknada za privremeno korištenje javne površine iz stava (1) ovog člana plaća se jednokratno ukoliko ne prelazi iznos od 100,00 KM, a ukoliko prelazi navedeni iznos unaprijed u dvije jednake rate. Prva rata plaća se prije preuzimanja rješenja kojim se

odobrava privremeno korištenje javne površine, a druga rata po isteku polovine odobrenog vremena korištenja.

Član 26.

(1) Naknada za postavljanje uređaja za pečenje i prodaju pečenjarskih proizvoda (kukuruz, kestena, pomfrita, slatke vune, sjemenki i slično mjesečno po jednom uređaju iznosi:

- a.) Ekstra zona 35,00 KM
- b.) Prva zona 25,00 KM
- c.) Druga zona 15,00 KM
- d.) Treća zona 10,00 KM

(2) Naknada za privremeno korištenje javne površine iz stava (1) ovog člana plaća se jednokratno ukoliko ne prelazi iznos od 100,00 KM, a ukoliko prelazi navedeni iznos unaprijed u dvije jednake rate. Prva rata plaća se prije preuzimanja rješenja kojim se odobrava privremeno korištenje javne površine, a druga rata po isteku polovine odobrenog vremena korištenja.

Član 27.

(1) Naknada za privremeno korištenje javne površine za postavljanje objekta za pružanje jednostavnih usluga u nepokretnom ili priključnom vozilu i na kolicima mjesečno po jednom objektu, iznosi:

- a.) Prva zona 50,00 KM
- b.) Druga zona 40,00 KM
- c.) Treća zona 30,00 KM

(2) Naknada za privremeno korištenje javne površine iz stava (1) ovog člana plaća se jednokratno ukoliko ne prelazi iznos od 100,00 KM, a ukoliko prelazi navedeni iznos unaprijed u dvije jednake rate. Prva rata plaća se prije preuzimanja rješenja kojim se odobrava privremeno korištenje javne površine, a druga rata po isteku polovine odobrenog vremena korištenja.

Član 28.

(1) Naknada za postavljanje aparata zabavnog sadržaja /dječijih autića, bicikala, vozića i sličnih rekvizita za dječiju zabavu/ mjesečno po jednom aparatu iznosi:

- a.) Ekstra zona 45,00 KM
- b.) Prva zona 35,00 KM
- c.) Druga zona 30,00 KM
- d.) Treća zona 20,00 KM

(2) U Ekstra zoni može se dozvoliti postavljanje samo električnih statičnih zabavnih sadržaja (autići, bicikli, konjići, slonići i slično).

(3) Naknada za privremeno korištenje javne površine iz stava (1) ovog člana plaća se jednokratno ukoliko ne prelazi iznos od 100,00 KM, a ukoliko prelazi navedeni iznos unaprijed u dvije jednake rate. Prva rata plaća se prije preuzimanja rješenja kojim se odobrava privremeno korištenje javne površine, a druga rata po isteku polovine odobrenog vremena korištenja.

Član 29.

(1) Naknada za postavljanje žardinjere za cvijeće, suncobrana, klupe za sjedenje, korpe za otpatke, stubića, jarbola, ograde i sličnih sadržaja mjesečno po jednom komadu iznosi:

- a.) Ekstra zona 15,00 KM
- b.) Prva zona 10,00 KM
- c.) Druga zona 8,00 KM
- d.) Treća zona 6,00 KM

(2) Naknada za privremeno korištenje javne površine iz stava (1) ovog člana plaća se jednokratno ukoliko ne prelazi iznos od 100,00 KM, a ukoliko prelazi navedeni iznos unaprijed u dvije jednake rate. Prva rata plaća se prije preuzimanja rješenja kojim se odobrava privremeno korištenje javne površine, a druga rata po isteku polovine odobrenog vremena korištenja.

Član 30.

(1) Naknada za postavljanje cirkuskog šatora, montažno-demontažnih bina u svrhu održavanja kulturnih, zabavnih, sportskih i drugih manifestacija takmičarskog karaktera, luna-parka, ringišpila, karting takmičenja i slično iznosi 1,00 KM za jedan dan po 1,00 m² u svim zonama.

(2) Naknada za privremeno korištenje javne površine iz stava (1) ovog člana plaća se jednokratno ukoliko ne prelazi iznos od 100,00 KM, a ukoliko prelazi navedeni iznos u dvije jednake rate. Prva rata plaća se prije preuzimanja rješenja kojim se odobrava privremeno korištenje javne površine, a druga rata po isteku polovine odobrenog vremena korištenja.

Član 31.

Naknada za javni parking prostor na neizgrađenom građevinskom zemljištu izuzetom iz posjeda ranijeg vlasnika, te parkiranje autobusa, kamiona, cisterni, kamp prikolica na ovom zemljištu od strane privrednih društava i fizičkih lica mjesečno po 1 m² iznosi:

- a.) Prva zona 2,00 KM
- b.) Druga zona 1,00 KM
- c.) Treća zona 0,50 KM

(2) Naknada za privremeno korištenje javne površine iz stava (1) ovog člana plaća se mjesečno unaprijed, a za prvi mjesec korištenja prilikom preuzimanje rješenja.

Član 32.

(1) Naknada za odlaganje građevinskog materijala, utovar i istovar građevinskog materijala (ograđeni dijelovi gradilišnog prostora), postavljanje fasadnih građevinskih skela, kontejnera i drugih objekata za potrebe gradilišta, mjesečno po 1 m² iznosi:

- a.) Prva zona 2,00 KM
- b.) Druga zona 1,00 KM
- c.) Treća zona 0,50 KM

(2) Korisnici javnih površina za namjene iz stava (1) ovog člana dužni su ovu površinu ograditi i označiti propisanim znacima.

(2) Naknada za privremeno korištenje javne površine iz stava (1) ovog člana plaća se mjesečno unaprijed, a za prvi mjesec korištenja prilikom preuzimanje rješenja.

Član 33.

Naknada za odlaganje građevinskog materijala namijenjenog za prodaju, ogrijevnog drveta, uglja, čumura, izlaganje polovnih automobila namijenjenih za prodaju, namještaja, stolarije i slično mjesečno po 1 m² iznosi:

- a.) Prva zona 2,50 KM
b.) Druga zona 2,00 KM
c.) Treća zona 1,00 KM
(2) Naknada za privremeno korištenje javne površine iz stava (1) ovog člana plaća se mjesečno unaprijed, a za prvi mjesec korištenja prilikom preuzimanje rješenja.

Član 34.

- (1) Naknada za postavljanje jednog sanduka za čišćenje obuće i vage za mjerenje tjelesne težine lica u Ekstra zoni iznosi 15,00 KM, a u ostalim zonama 10,00 KM mjesečno.
(2) Naknada za privremeno korištenje javne površine iz stava (1) ovog člana plaća se mjesečno unaprijed, a za prvi mjesec korištenja prilikom preuzimanje rješenja.

Član 35.

Naknada za postavljanje drugih sadržaja i uređaja obračunava se i plaća na način utvrđen ovom Odlukom, prema sličnosti sa sadržajima utvrđenim ovom Odlukom.

Član 36.

Nadležne Službe uspostavljaju evidenciju korisnika javne površine i korisnika koji postupaju suprotno odredbama Zakona o privremenom korišćenju javnih površina na području Kantona Sarajevo i odredbama ove Odluke.

Član 37.

- (1) Korisnicima javne površine koji nisu u cjelosti izmirili naknadu za ranije odobreni period, ne može se ponovo izdati odobrenje za korištenje javne površine, a protiv istih bit će pokrenut postupak prinudne naplate putem nadležnog Suda.
(2) Korisniku javne površine kojem je izrečen gubitak prava korištenja javne površine zbog dugovanja naknade, izuzetno se može odobriti korištenje javne površine na prijedlog Općinskog načelnika uz dostavu dokaza o izmirenju dugovanja.

Član 38.

(1) Privremeno korištenje javnih površina bez obaveze plaćanja naknade odobrit će se korisnicima za sljedeće namjene:

- a.) vlasnicima poslovnih prostora u Ekstra zoni za obavljanje odobrene djelatnosti u prostoru ispod dograđenih nastrešica čiju dogradnju su sami finansirali, uz obavezu ostavljanja prostora za pješake minimalno 1,0 m;
b.) za potrebe ustanova iz oblasti predškolskog obrazovanja i vaspitanja, prosvjete, nauke, kulture, zaštite kulturne i prirodne baštine, zdravstva, veterine, socijalne zaštite, humanitarnih i dobrotvornih organizacija;
c.) za potrebe političkih organizacija i pojedinaca u svrhu prikupljanja potpisa, održavanja političkih tribina i predizbornih skupova;
d.) za potrebe udruženja građana proisteklih iz odbrambeno-oslobodilačkog rata, udruženja čiji članovi pripadaju socijalno ranjivoj kategoriji i drugih neprofitnih udruženja u svrhu prikupljanja podataka o svojim članovima, prikupljanja potpisa radi izražavanja svojih stavova i drugih podataka koje će koristiti udruženje i prikupljanje sredstava za redovne djelatnosti;
e.) za postavljanje pokretnog stola u trajanju od jednog dana u cilju reklamiranja proizvoda;

- f.) za održavanje kulturnih, vjerskih, zabavnih i sportskih manifestacija koje se priređuju besplatno i u humanitarne svrhe;
- g.) sanacija, rekonstrukcija i obnova objekata koja se finansira iz donatorskih sredstava i sredstava etažnih vlasnika i
- h.) drugih sadržaja od značaja za Općinu Ilijaš koje kao takve ocjeni Općinski načelnik.

Član 39.

- (1) Protiv rješenja o privremenom korištenju javnih površina u drugom stepenu rješava Ministarstvo prostornog uređenja, građenja i zaštite okoliša Kantona Sarajevo.
- (2) Protiv Rješenja Općinskog načelnika o utvrđivanju visine naknade u drugom stepenu rješava Drugostepena stručna komisija Općinskog vijeća Ilijaš.

Član 40.

- (1) Ukoliko korisnik, iz bilo kojih razloga, prestane koristiti javnu površinu dužan je odmah o tome obavijestiti organ koji mu je odobrio njeno korištenje i podnijeti zahtjev nadležnoj Službi za oslobađanje od daljnje obaveze plaćanja naknade.
- (2) Rješenje o prestanku korištenja javne površine i oslobađanju od obaveze plaćanja naknade za korištenje donosi organ koji je i odobrio njeno korištenje, nakon što se na licu mjesta utvrdi da je korisnik istu napustio.
- (3) Obaveza plaćanja naknade za korištenje javne površine prestaje od dana podnošenja zahtjeva za donošenje rješenja iz stava (2) ovog člana.

Član 41.

Naknada za korištenje javne površine uplaćuje se na žiro račun Općine Ilijaš sa naznakom: naknada za privremeno korištenje javne površine.

Član 42.

- (1) U vrijeme održavanja Manifestacije "Ilijaški dani" slobodne javne površine na privremeno korištenje dodjeljuje organizator Manifestacije neposrednom pogodbom, ali ne po nižoj naknadi od visine naknade utvrđene ovom Odlukom.
- (2) Nakon završetka Manifestacije iz stava (1) ovog člana Organizator je dužan javne površine koje je ustupao na privremeno korištenje dovesti u prvobitno stanje (ukloniti postavljene sadržaje i otpad, oprati ih i drugo).

V - PRESTANAK KORIŠTENJA JAVNE POVRŠINE

Član 43.

Korištenje javne površine može prestati:

- donošenjem Rješenja o prestanku prava na korištenje;
- istekom roka utvrđenog Rješenjem;
- na osnovu Rješenja komunalnog inspektora o uklanjanju sadržaja sa javne površine.

Član 44.

- (1) Općina Ilijaš može donijeti Rješenje o prestanku prava na privremeno korištenje javne površine i prije isteka roka ukoliko Korisnik:
 - koristi javnu površinu suprotno odredbama Rješenja;
 - u momentu inspeksijskog nadzora koristi javnu površinu izvan utvrđenih gabarita,

odnosno uopće ne posjeduje Rješenje o korištenju javne površine;

- izgubi pravo obavljanja poslovne djelatnosti koja je predmetom Rješenja, na osnovu pravosnažnog rješenja ovlaštenog organa;

- ne izmiri naknadu za korištenje javne površine

(2) Otkaz Ugovora iz stava (1) ovog člana raskida se pisanim putem uz otkazni rok od 5 (pet) dana od dana prijema obavijesti.

Član 45.

(1) Korisnik javne površine može jednostrano otkazati privremeno korištenje javne površine samo pisanim putem uz otkazni rok od 15 (petnaest) dana, računajući od dana dostavljanja obavijesti o otkazu.

(2) U slučaju jednostranog raskida ugovora Korisnik je obavezan ukloniti sadržaje s javne površine i dovesti lokaciju u prvobitno stanje.

VI - ZAŠTITA JAVNIH POVRŠINA

Član 46.

(1) Korisnik javne površina može istu koristiti samo u svrhe i na način određen ovom Odlukom i u skladu sa izdatim Rješenjem o privremenom korištenju javne površine.

(2) Odobrenje za korištenje javne površine i potvrdu o uplaćenju zakupnine korisnik je obavezan imati na licu mjesta, sve vrijeme korištenja javne površine i iste pokazati na zahtjev nadzornog organa određenog ovom Odlukom.

(3) Zakupljenu javnu površinu, kao i objekte na istoj, korisnik je obavezan držati u urednom stanju i čistim. Nakon prestanka korištenja javne površine korisnik je obavezan ukloniti sve tragove korištenja javne površine, odnosno treba je dovesti u stanje prije početka korištenja i javnu površinu dovesti u prvobitno stanje (asfaltiranje, čišćenje, sijanje trave, sadenje ukrasnog rastinja i cvijeća).

Član 47.

(1) Odobrenjem za zauzimanje javnih površina u cilju vršenja radova na čišćenju, opravci vanjskih dijelova zgrade i njihovo uređenje (oluci, fasade i sl.) utvrdit će se obaveza izvođača radova da u svrhu upozorenja učesnika u saobraćaju mora na mjestu izvođenja radova postaviti propisne oznake po kojima će biti vidljivo da je prolaz opasan.

(2) U slučajevima, kada se na objektu vrše zahvati, koji mogu trajati duži period, izvođač radova je dužan iznad pločnika izvesti platformu, koja će obezbijediti nesmetanu komunikaciju pješaka.

(3) Ako se prilikom izvođenja radova oštete javne površine izvođač radova je dužan istu sanirati u roku od 48 sati.

(4) U slučaju da investitor u određenom roku ne izvrši opravku izdat će se nalog ovlaštenom preduzeću za saniranje oštećenih površina o trošku investitora.

Član 48.

(1) Odobrenje za zauzimanje dijela javne površine za deponovanje i pripremanje građevinskog materijala utvrdit će se obaveza izvođača da zauzetu površinu ogradi i označi propisnim znakovima, i time omogućiti bezbjedan prolaz pločnikom i ulicom, te da ne ometa odvijanje saobraćaja kao i da ne vrši oštećenje zgrade, ulice i pločnika.

(2) Građevinski materijal se mora složiti i uredno držati, te isto tako treba se obezbijediti i normalno oticanje oborinskih voda.

(3) U slučaju da investitor u određenom roku ne izvrši opravku izdat će se nalog

ovlaštenom preduzeću za saniranje oštećenih površina o trošku investitora.

VII – NADZOR

Član 49.

Poslovi inspekcijskog nadzora nad provođenjem ove Odluke vrše općinski inspektori i to kako slijedi:

Poslove u oblasti urbanizma opisane u članu 25. stav (1) Zakona o privremenom korištenju javnih površina općinski urbanističko-građevinski inspektor, a poslove u oblasti komunalnih djelatnosti opisanih u članu 25. stav (2) Zakona komunalni inspektor.

Član 50.

(1) U provođenju nadzora građevinsko-urbanistički i komunalni inspektor ovlašten je:

- vršiti kontrolu da li privremeni korisnik posjeduje rješenje za korištenje javne površine u skladu sa odredbama Zakona o privremenom korišćenju javne površine na području Kantona Sarajevo i odredbama ove Odluke, te da li javnu površinu koristi u skladu sa izdatim rješenjem.

- Poduzimati druge mjere i radnje za koje je ovlašten, u skladu sa Zakonom o privremenom korištenju javnih površina na području Kantona Sarajevo, Zakonom o komunalnim djelatnostima i ovom Odlukom

(2) U provođenju nadzora nadležni inspektor dužan je poduzimati mjere u cilju otklanjanja utvrđenih nedostataka kao i donijeti upravni akt kojim će narediti uklanjanje bespravno postavljenih sadržaja na javnoj površini.

(3) Protiv upravnih akata urbanističko – građevinskog i komunalnog inspektora u drugom stepenu rješava Ministarstvo prostornog uređenja, građenja i zaštite okoliša Kantona Sarajevo.

(4) Žalba ne odgađa izvršenje upravnog akta.

VIII - KAZNE NE ODREDBE

Član 51.

(1) Novčanom kaznom u iznosu od 5.000,00 KM do 10.000,00 KM kaznit će se za prekršaj pravno lice ili imalac radnje ako:

- a.) privremeno koristi javnu površinu suprotno odredbi člana 5. Zakona;

- b.) kao izvođač radova, privremeno zauzetu javnu površinu ne ogradi i ne označi propisanim znacima, ometa odvijanje saobraćaja, ošteti zgradu, ulice i trotoare, kao i ako građevinski materijal ne složi, uredno ne drži i ne obezbijedi normalno oticanje oborinskih voda.

- c.) ako korisnici javnih površina istu ne održavaju u urednom stanju, a po isteku roka iz odobrenja, javnu površinu ne dovedu u prvobitno stanje i ako u slučaju potrebe ili u slučaju privođenja zemljišta krajnjoj namjeni u skladu sa važećim planskim dokumentom, ne uklone sadržaje postavljene na javnoj površini i prije isteka utvrđenog roka.

Član 52.

(1) Novčanom kaznom u iznosu od 500,00 KM do 1.000,00 KM kaznit će se za prekršaj fizičko lice ako:

- a.) privremeno koristi javnu površinu suprotno odredbi člana 5. Zakona;

- b.) kao izvođač radova, privremeno zauzetu javnu površinu ne ogradi i ne označi propisanim znacima, ometa odvijanje saobraćaja, ošteti zgradu, ulice i trotoare, kao i ako građevinski materijal ne složi, uredno ne drži i ne obezbijedi normalno oticanje oborinskih

voda.

c.) ako korisnici javnih površina istu ne održavaju u urednom stanju, a po isteku roka iz odobrenja, javnu površinu ne dovedu u prvobitno stanje i ako u slučaju potrebe ili u slučaju privođenja zemljišta krajnjoj namjeni u skladu sa važećim planskim dokumentom, ne uklone sadržaje postavljene na javnoj površini i prije isteka utvrđenog roka.

Član 53.

Novčanom kaznom od 500,00 KM (mandatna kazna) kaznit će se pravno lice ili imalac radnje a odgovorno lice i pojedinac od 100,00 KM, ako postupi suprotno odredbama člana 21. Zakona.

Član 54.

Sredstva od naplaćenih kazni, propisanih ovom Odlukom, prihod su Općine Ilijaš, a koristit će se za uređivanje i održavanje javnih i zelenih površina.

IX – PRIJELAZNE I ZAVRŠNE ODREDBE

Član 55.

Na pitanja koja nisu uređena ovom Odlukom primjenjivat će se odredbe Zakona o privremenom korištenju javnih površina na području Kantona Sarajev ("Službene novine Kantona Sarajevo", broj: 20/04, 26/12, 32/12 i 24/15).

Član 56.

Danom stupanja na snagu ove Odluke prestaje da važi Odluka o privremenom korišćenju javnih površina na području Općine Ilijaš ("Službene novine Kantona Sarajevo", broj: 23/14 i 24/16).

Rješenja donesena na osnovu Odluke o privremenom korišćenju javnih površina na području Općine Ilijaš, izdata do stupanja na snagu ove Odluke, ostaju na snazi do isteka roka utvrđenog u Rješenjima.

Član 57.

Ova Odluka stupa na snagu danom objavljivanja u "Službenim novinama Kantona Sarajevo".

Broj: 01/1-02-_____/19
Ilijaš, _____.2019.godine

**PREDSJEDAVAJUĆA
OPĆINSKOG VIJEĆA ILIJAŠ**

Alma Omerović, BA nov.

O b r a z l o ž e n j e:

I - Pravni osnov

Pravni osnov za donošenje Odluke o privremenom korištenju javnih površina na području Općine Ilijaš sadržan je u Zakonu o privremenom korišćenju javnih površina na području Kantona Sarajevo ("Službene novine Kantona Sarajevo", broj: 20/04, 26/12, 32/12 i 24/15) kojim se utvrđuju javne površine koje se mogu privremeno koristiti, njihova namjena, uslovi i način privremenog korištenja javnih površina, poslovi prvostepenog upravnog rješavanja iz oblasti urbanizma i komunalnih djelatnosti, naknada za korištenje javne površine, nadzor nad provođenjem Zakona i druga pitanja od značaja za privremeno korištenje javnih površina na području Kantona Sarajevo. U članu 27. stav 2. Zakona o privremenom korištenju javnih površina na području Kantona Sarajevo propisano je da visinu naknade svih vidova privremenog korištenja javnih površina utvrđenih Zakonom, način naplate, usmjeravanje i mjere za sigurnu i efikasnu naplatu utvrđuje svojim propisom Općinsko vijeće.

Pravni osnov za donošenje ove Odluke sadržan je u članu 55. i 104. Statuta općine Ilijaš – prečišćeni tekst ("Službene novine Kantona Sarajevo", broj: 20/09) kojim su definisane nadležnosti Općinskog vijeća i propisi koje Općinsko vijeće donosi te članu 99. Poslovnika Općinskog vijeća Ilijaš ("Službene novine Kantona Sarajevo", broj: 2/10, 18/05, 7/19) kojim su definisani propisi koje donosi Općinsko vijeće.

II - Razlozi za donošenje ove Odluke

Imajući u vidu činjenicu da je u svim zonama na području Općine Ilijaš došlo do otvaranja niza poslovnih i ugostiteljskih objekata što dovodi do povećanja interesa za korištenjem javnih površina za različite sadržaje, pokazalo se neophodnim usvojiti novu Odluku kojom se regulišu posebni uslovi i način privremenog korištenja javnih površina, poslovi prvostepenog upravnog rješavanja iz oblasti urbanizma i komunalnih djelatnosti, naknada za korištenje javne površina, mjere za sigurnu i efikasnu naplatu i druga pitanja od značaja za ovu oblast.

Visina naknade za plaćanje po osnovu privremenog korištenja javnih površine u odnosu na prethodnu Odluku u svim zonama ostala je ista.

Općinsko vijeće Ilijaš je na svojoj 29. sjednici, održanoj dana 27.03.2019. godine usvojilo Zaključak, broj: 01/1-02-620-6/19 od 27.03.2019. godine i istim uputilo Nacrt Odluke o privremenom korištenju javnih površina na području Općine Ilijaš na javnu raspravu objavom putem web stranice Općine Ilijaš (www.ilijas.ba), javnim uvidom u maloj sali Općine Ilijaš svakim radnim danom u vremenu od 09:00 – 14:00 u periodu od 28.03.2019. do 15.04.2019. godine, organiziranjem javne prezentacije u sali Općinskog vijeća na dan 16.04.2019. godine sa početkom u 14:00 sati.

Primjedbe na Nacrt Odluke o privremenom korištenju javnih površina u pisanoj formi je dostavila Služba za prostorno uređenje i zaštitu okoliša Općine Ilijaš.

Javna rasprava je održana 16.04.2019. godine u sali Općinskog vijeća Ilijaš. Na istoj su bili prisutni predstavnici Službe za prostorno uređenje i zaštitu okoliša i predstavnici Službe za saobraćaj, stambeno-komunalne poslove i građenje Općine Ilijaš.

Prijedlozi Službe za prostorno uređenje i zaštitu okoliša su evidentirani, saslušani i jedan dio prijedloga je ugrađen u tekst Odluke o privremenom korištenju javnih površina na području Općine Ilijaš. Na prijedlog Službe za prostorno uređenje i zaštitu okoliša

području Općine Ilijaš. Na prijedlog Službe za prostorno uređenje i zaštitu okoliša prijedlozi koji su ugrađeni u tekst Odluke su:

U članu 1. ispred riječi "uslovi" dodaje se riječ "posebni".

Brisan član 6., pa je član 7. iz Nacrta Odluke o privremenom korištenju javnih površina sada član 6.

U članu 10. stav 1. mijenja se i glasi: "Dodjelu lokacija za privremeno korištenje javnih površina na osnovu elaborata, za postavljanje kioska i slobodnostojećih otvorenih bašti, slobodnostojećih reklamnih panoa, slobodnostojećih displeja i slobodnostojećih telefonskih govornica vrši Služba za prostorno uređenje i zaštitu okoliša".

U Članu 16. dodaje se stav 3. koji glasi: "Nakon isteka roka za podnošenje prigovora na Rang listu Općinski načelnik putem Službe za prostorno uređenje i zaštitu okoliša donosi Rješenje o dodjeli javne površine na privremeno korištenje".

Brisan član 21. stav 3. Nacrta Odluke o privremenom korištenju javnih površina na području Općine Ilijaš.

Brisan član 22. Nacrta Odluke o privremenom korištenju javnih površina na području Općine Ilijaš.

Brisane riječi u članu 24. stav 2. "i postavljanje tende na tlo i konzolno iz prethodno pribavljeno odobrenje za građenje".

Član 39. Nacrta Odluke o privremenom korištenju javnih površina na području Općine Ilijaš je postao član 38. mijenja se i glasi: a.) vlasnicima poslovnih prostora u Ekstra zoni za obavljanje odobrene djelatnosti u prostoru ispod dograđenih nastrešica čiju dogradnju su sami finansirali, uz obavezu ostavljanja prostora za pješake dodaje se "minimalno 1,0 m".

Predlagač Odluke o privremenom korištenju javnih površina na području Općine Ilijaš je Općinski načelnik shodno odredbi člana 113. Poslovnika Općinskog vijeća Ilijaš ("Službene novine Kantona Sarajevo", broj: 2/10 i 18/05, 7/19).

Obrađivač Odluke je Služba za saobraćaj, stambeno-komunalne poslove i građenje Općine Ilijaš.

Donošenje ove Odluke planirano je Programom rada Općinskog vijeća Ilijaš za 2019. godinu.

Predlažemo Općinskom vijeću Ilijaš da Odluku o privremenom korištenju javnih površina na području Općine Ilijaš donese u predloženom tekstu.